

上海圖書館

未書號碼 _____

登記號碼 511900

新津縣鄉土志目錄

卷一

地圖

歷史

政績

兵事

耆舊

人類

戶口

民族



宗教
實業

卷二

地理

道路

山

水

物產

商務

新津縣鄉土志卷一

歷史

邑之有志猶國之有史古者大司徒之職掌建邦之土圖與其
 人民之數山川名物又有土訓掌道地圖以詔地事誦訓掌道
 方志以詔觀事兩漢郡國皆有圖六朝以降厥製綦繁非徒山
 川能察可為大夫亦以生斯土者鄉邦職志乃所必究新津疆
 域不逮百里而建置最古在漢之世元鼎二年置武陽縣隸犍
 為郡有鐵官漢書地理志案武陽有二史記趙世家云孝成王十九年
 趙燕易土以龍兌汾門與燕燕與葛城武陽與趙後漢書呂布
 傳興平元年曹操東擊陶謙令其將武陽人陳宮屯東郡水經

注易水又東逕武陽城南燕之下都擅武陽之名武陽大城東南小城卽故安縣之故城也又曰濡水又東逕武陽城西北故安卽今固安隸順天府孝昭元始三年以郡治樊道今宜南夷數反遂移犍爲郡於武陽歷東漢至晉宋不改南齊乃還治樊道今縣東五里有舊縣遺址川原平敞雅擅形勝當卽其地元和郡縣志亦云昭帝時自樊道移理武陽漢之犍爲屬縣十二境土廣遠遷徙不常有改置牂柯郡之營邑者地爲今之遵義故注爾雅之犍爲舍人兩省並稱而武陽屬境則兼有彭山眉州仁壽諸境故光武云武陽爲士大夫郡水注經漢以後因仍不改北周閔帝元年始置新津縣復徙犍爲郡治於此而縣仍屬

犍爲郡按李膺益州記皂里江津之所曰新津市取名殆本於此矣由唐至明間隸崇慶州而縣如故

國朝定鼎康熙六年兼併雙流雍正八年復循舊制新雙定爲二縣永隸成都府屬此縣之建置也緯書甄曜度云岷山之精上應井絡帝以會昌神以建福觜參之星實主益州又爲井鬼分野蜀之爲國肇造人皇迥殊成索黃帝之世畫井分疆降其子昌意於若水若水卽灌江水無注娶蜀山之女生子高陽是爲帝

譽封其支庶於蜀世爲侯伯舜禹之世實爲梁州其時聲教四訖塗山之會朝貢萬國梁州疆域廣莫無垠禹貢所云華陽黑水者當爲今之瀾滄江導黑水至於三危入於南海者三危當

在今之後藏南海當在印度洋一名小西洋矣武王伐殷則有庸蜀羌
豳微盧彭濮八國會於孟津入春秋世經有庸巴濮糜計時新
津故地當在庸蜀之間雖奉王職困於偏遠不得與列國盟會
周衰蜀先稱王豎叢魚鳧以次立國今牧馬山新雙接界其墓
猶存七國雲擾有王杜宇教民務農號曰望帝其相開明決玉
壘山以除水害禪之以位傳盧及保乃為秦惠王所滅杜宇移
治郫邑或治瞿上今雙流開明乃移治成都秦滅蜀置蜀郡有縣
全境之地始皇分天下為三十六郡後遂因之郡治在青衣江
其地在古嘉州龍遊界當在今之樂山境漢武建元六年開犍
為郡縣境乃改隸犍為不隸蜀郡又分天下為九以符職方之

數州置刺史郡屬益州元光四年刺史任安嘗城武陽今新
莽篡漢郡國悉易改犍為曰西順武陽曰戢成然自前漢移犍
為郡治武陽而縣屬犍為蜀漢因之晉分天下為十九州益州
之外添梁州梁治南鄭益治成都而縣仍屬犍為郡屬益州如
故劉宋因之南齊乃還郡治夔道而縣仍如故梁武帝大同十
年始改縣為犍為郡為戎州魏又改犍為隆山復武陽縣地北
周乃置今縣隋初郡廢以縣屬益州後併省諸州復改州為郡
縣屬蜀郡益州之名遂廢開皇初乃移今治唐初尋立益州焉
至德二年改益州為成都府縣並屬之垂拱二年改蜀州今崇州
并屬建南道宋初亦屬蜀州淳熙四年屬崇慶府咸平四年分

益梓利夔爲四路蜀州新津並屬成都路元改蜀州爲崇慶州
縣屬於州仍隸成都府而總於四川行中書省明初仍屬崇慶
其後統歸於成都府今仍其舊是爲縣之沿革皆歷史也

政績

世稱蜀人善感故多循吏而諛詞虛迹昔人所譏雖有記載當
從紀實夫國家之大利在農禹貢考工首重水利水經一書詳
於坡塘堰塌蜀稱天府之國沃野千里亦就成屬邛眉言之外
此則多山少平地矣顧民情渙散力薄習淺非賢有司督率未
易言樂利也都江之堰民依是擊創於秦太守李冰無俟贅述
縣之大堰見於水經當亦李公所導水門有六惜其遺法失傳
蜀漢之世李嚴鑿山厥功亦偉其後開元二十八年採訪使章
仇兼瓊開通濟堰穿渠溉田隣境沾惠五代至元張琳雍熙重
加修濬雍正中制府黃公廷桂壘石爲堤實以竹篾旁引諸水

規畫益備宋公灝紀錄章章可考乾隆之世永康徐公堯引西河以廣堰水循山温公清引沙溝以益文井溉田億萬功俾鄭白有羊頭堰者乾隆末被水冲決農人失業介休陳公常躬行相度捐俸開渠民懷其德稱爲湛恩焉縣治瀕河屢經水患南海宋公灝兩知縣事歷年七載連膺卓薦爰建江堤以固城根同治初元富平翟公寶善來攝邑大興文學治行優異秩滿被留修堤之餘嘗與彭山某令議定堰式引義力爭毋得踰度以故歷年久遠民免其魚縣又通道民嘗病涉山陰孫公開嘉光緒六年來權縣篆廉明絕人薦留上考一如翟公建三渡橋梁冬修夏拆將舊義渡加以振頓前任良俊益用推廣孫公復

創三費局以省徭役設保甲以弭盜匪丁文誠保爲川省牧令第一他若昆明羅公廷權之定和抬章程元和韓公清桂之除苛擾弊政新甯羅公雲碧之創學田更修城垣安化廖公秉鈞之重修學宮平越楊公昌錦廣順趙公家蕙先後請減捐輸昌錦之孫錫澍改建學堂多設初等蒙學此其興利之最著者也國初之世大難初平人民尙少有常九經者盡心撫字每男婦出耕幼孩悉送官署官爲視養至夜引歸時奉薪米與之同饗稱爲父母名實相應於時兵燹初息文獻蕩然金壇王公汝驥以江左名宿作宰是邦興學愛民榛蕪啟化繼之者爲金華王夢庚教養兼至治行尤燦至於除害更有可言孟昶驕侈大選

良家邑令陳及之上疏極諫後主賜金旌表其直治平元豐之間劉叔寶安字相繼作宰敷教屏害門邪禦慝建祠繪像流詠至今崇禎末林翹楚政治嚴肅民吏畏憚下車伊始誅鋤土豪五人一境稱快以勞卒官祀於名宦

聖

清御字重熙累盛吏治修明實邁前代雍乾諸朝庶務整肅滯蠹不生道光季葉崇極而圯金田盜作劫掠相望豐城毛公震壽發奸捕伏疾惡如風掃蕩賊巢遠至隣境公餘賦詩講學廣置經藉臧度書院海擢廉使布政三秦其孫慶蕃今官河北道玉麟見官叙州府知府人以爲循良之報藍逆西上益部倂擾兇徒數萬火照江城葛公鳳修忠義奮發先置礮船激厲民兵

轟弊前隊官軍從而掩擊賊衆氣沮始竄崇溫民不被兵城賴以完揆其功勳允宜廟食承平既久官吏敲訛諱盜容奸賊氛始熾通衢擾攘商旅裹足新城王公樹枌蒞任之下威令首塗擒斬六十餘人豪猾惴息方欲徵文考獻而量移富順以事去官未幾開復起用宣力隴西見官新疆布政其後廉平顏公鍾運廉明果決大類王公以懲責勇弁拂上官意竟罹劾典飲恨而終廉吏豈真不可爲耶昔漢宣帝嘗有言曰庶民所以安其田里而亡嘆息愁恨之心者以政平訟理也故大學聽訟大畏民志聖言以爲知本訟之爲字從言從公詩美皋陶之淑問孔子稱子路之折獄蓋必明以燭幾健以決事而又廉威誠信方

能厭服羣情也二百餘年賢令茂宰項背相望遺聞舊錄多軼而不傳就余所知道光以來如以上數公之外尙有沔陽鄭公東華善化張公壽榮平越張公繼增山陰李公大林類皆機牙四應判決如流卓卓有聲庭無留牘而事既缺遺又多瓌瓌義從蓋闕兩廳之秩佐治縣宰職司犴獄捕廳爲重向係開門聽認今則例有公費屏絕一切幾同閒散而童永年乾隆初歲服官最久仁惠彰著沒葬縣境子孫昌熾藥社桐鄉互爲標映矣若夫廣文一官已成冷宦而宣教明化職守綦重考諸舊志姓氏寥寥前明惟南昌李洪才高博學垂聲今世官至光祿少卿晚近以來絕無紀載而大邑蕭公國瑞前後秉鐸四十餘年地方利病多所建白培修聖廟江堤深賴其力年踰八秩考終里第其遇爲自來未有也

兵事

蜀阻西徼兵禍無中原之烈孟津之役庸蜀嘗以兵會揆其故道當西出隴西經由階成也終周之世僻在荒服山川險遠民生不見兵革其後蜀貪秦賂乃始被兵華陽國志稱周慎王五年秋秦張儀司馬錯都尉墨等從金牛道伐蜀蜀王自於葭萌拒之敗績遁走至武陽爲秦軍所害公孫述據蜀蜀拒守邑人朱遵爲郡功曹拒戰而死傳其地在今之黃坭壩此兵事之在於本境者也光武建武十一年命大將軍岑彭伐述旣又遣吳漢劉隆進討彭至武陽繞出述將延彭之後爲述刺客所刺其後吳漢兵入犍爲圍武陽拔廣都遣輕騎燒成都市橋武陽以

東諸小城皆降十三年三月滅述蜀平此兵事之進在本境而
涉及本境者也考之舊志蜀漢六朝不詳寇亂惟唐末南詔恣
睢蜀中被禍最甚史稱懿宗咸通十年曾龍入寇攻陷黎雅節
度使盧耽與之約和未定蠻次新津遂圍成都其後南詔數萬
入寇耽遣大將宋威屢敗之曾龍遁還雙流至新穿阻水無梁
幾至赴水十四年坦綽復寇既陷黎丹復攻雅邛成都大震僞
書欲假道入朝請憇蜀王故殿節度使牛叢欲許之楊慶後力
諫業乃拒使切責嚴兵以待坦綽至新津而還僖宗乾符元年
南詔劫畧雋雅尋掠成都閉門三日新雙一路蹂躪更甚中和
二年邛州牙官阡能爲亂衆至數萬節度使陳敬瑄使都招討

高仁厚討之至雙流縣破得賊伏兵仁厚撫諭之曰藉汝曹爲
我前行過新穿口至新津砦下告諭之比至延貢地名可歸矣
尋至穿口降其衆進至新津降其十二砦按穿口以新穿水名
來自雙流九域志載新津有新穿鎮至十二砦統以新津其爲
隔江諸山無疑蓋縣爲西南通道南詔入寇往來俱經於此此
兵事之在於本境者也宋初取蜀用兵皆在北路惟宋史懋知
左傳稱太宗淳化三年青城縣民王小波爲亂攻陷邛州都巡
檢郭允能率其下與小波戰新津江口爲賊所殺今之江口歸
彭山轄境楊柳河入江處一曰河或卽其地又至道中劉旣脅
牙兵爲亂連下州縣都巡檢馬知節與戰旣走邛州上官正與

知節領兵趨新津方井鎮擊敗之元取成都大肆屠戮舊志未詳省外州縣被禍或輕史志所載惟世祖中統元年宋將以舟師二千犯成都新津忽都逆賊於新津戰敗之斬首百五十級而已有明之興二百餘歲蜀藩多賢中鮮寇亂而獻賊以梟獍之性率捕逃之孽破城屠邑橫行萬里數年之間蹂踐天下之半嗣昌趨之入蜀而蜀人受禍更酷志稱順治元年八月賊陷成都掠崇慶州入新津大肆屠戮人民殆盡後止存六七姓皆平定後逃歸者次年川陝總督樊一蘅連戰敗賊而楊展諸軍漸次恢復逮一蘅移駐納溪而展軍直抵新津是縣附近省城爲兵寇所必經然自有書籍以來未有如明季之甚者昔人稱

爲刼數其信然耶抑人心乖盪有以致之也

聖清受命薄賦省刑德澤深厚遠軼前代雍乾之世雖征青海西藏喀爾喀而禁旅過境芻茭糗糧之屬率皆公帑取辦官吏供億閭里無擾嘉慶初歲教匪不靖川楚連兵幾近十年而多在綏夔順保之境避難者恒遷居之縣中號爲樂土道光末粵匪事起蜀中漸致不靖咸豐十年藍逆西竄由崇慶州轉折縣境其時縣令爲葛公鳳修以八年蒞任下車後振頓團練鄉勇不遺餘力賊將壓境先至張塲以安民心八月初四日賊擁衆由太平塲進攻葛公躬督團勇協同官軍拒戰於西門較塲南門水軍以礮臺殪其前鋒賊退城賴以全而太平鄉民罵賊死者

新濟縣志卷之二
甚衆當時援兵蔣軍門玉龍兵繫南岸諸山蓋邑山沓水匝爲
印眉屏蔽寶資諸山橫亘數十里實南道門戶故水經注稱平
岡之山蜀人避亂多居之也踰年李永和率賊西上蔣軍遇於
彭山龍門橋力戰敗之賊遂不復入境其佐葛公城守者拔貢
劉德澍教諭楊論烜增生程元第倪合章監生楊治平也方事
起城鄉內外爭輸錢米毫無慳吝雖由官長之督厲有方而人
心固結風氣猶爲近古葛公以功擢眉州花面懃直縣人猶豔
稱之中興以來西陲無警雖有土匪偶一蠢動而旋就撲滅無
復兵事可紀然承平日久武備寢弛內憂外患當先事以爲預
防兵可百年不用不可一日不備詰奸弭盜寓民兵於團練言

時政者恆斤斤焉

耆舊

耆舊之傳昉於陳承祚所以紀鄉賢述故實也昔新莽篡國人
 不忘漢更始起兵梁益遠奉職貢公孫述僭號蜀郡拒守邑人
 朱遵為郡功曹率兵督戰仗節死事義聲所激俊彥響臻糾合
 羣力卒復炎祚光武嘉歎封遵為輔漢將軍稱武陽為士大夫
 郡文物淵蓋匪伊自今前蜀之世兵事倖掠銅梁玉壘方罹塗
 炭王先成以一介書生徑叩軍門首陳利害條上七事兩川安
 堵安民定難功無與侔孟蜀驕奢大選良家張立陳詩託諷後
 主賜金以旌其直歸隱皂江積德積書以貽後人延及北宋曾
 孫唐英商英兄弟尉成國器孫抃稱為馬周大觀號其賢相前

輝後光埒名坡穎唐英之子庭堅弱冠登朝心懷忠鯁力明紹述諸臣以斥羣奸過諫坡山者尙傳高節裔孫張惠早侍元祖行省山東大贖俘囚比主饋餉軍食無缺江南之降籍其工匠卅萬惠惟選有藝業者餘悉奏還爲民揆之曹彬殆無慚色明之鄒國璽服官滇南首陳水患築壩開河民享其利厥孫鄒遇早擢南宮布政江西巡撫湖廣林時喬與之同時亦以孝廉官兩浙鹽運早年解組并祀鄉賢

國朝初世先無大科嘉慶初李岱以耆年碩學獨荷榮遇年踰八秩 恩賜舉人明年入都 賞賜翰林既由明經銓授儀隴學博歸教雪峯青衿累百徵文講藝享年一百四歲可謂太平

壽考矣繼李公而翰林者爲檢討童公棫童公以名父之子翔步清華學識淵洽胡文忠亟爲論薦見時多故不出主講錦江多士翔集晚歲入朝修

穆宗毅皇帝實錄鴻編告成分巡雷瓊以勞卒官時論惜之其成進士者四人檢討公之父宗顏以中書出守漳州實著循績岳公逢陽作宰華容罷官歸里從遊極盛彭澗芳經其指授文譽尤爍觀政秋曹出守衡州彭剛直與之定交胡從簡亦岳公再傳子弟邃於古義需次嶺南窮困益甚奉母西歸佗僚以死鄉氓無知至以讀書爲戒其不由科目者周淦起自貧微僅通大義投筆戎軒游擢太守歷權輿安漢中府事圭璋特達大府

稱賢蓬生胡麻不扶自置理或然矣自有科舉登賢書者四十
五人領解者岳昇彭潤芳也其服官最顯者田在公內陞兵部
主政白玉書嘗署慶遠知府而楊作槐之官邵陽陳世傑之官
臨海葉方模之官太和倪正翌之官新野治行尤著呂清揚以
理學魁儒一門雍睦倪坤以文章軌範兩子孝廉正人倫風
鑒其在於斯自餘官廣文者覃儒英之於鹽源苟珣之於資州
品端學劭共欽篤行珣姪召南司訓南溪與唐炯同禦藍逆力
保危城叙人猶能道其行事拔萃一科得人亦盛其官知縣者
沈鴻亮仕至霸州燕人感德徐仕烈歷官山右長相齡稱賢劉
德澍七載興化兩膺薦劄有沙河船戶全家被殺靡遺一人尸

沈於水人鮮知聞君過其境獨聞血腥滂其七尸老幼如生悉
心詢偵罔惜金緡罪人既得交頌神君而岳東陽以清標雅望
書法冠絕一時陳瓚之於慶符大興文學雖青氈一席而入祀
名宦蓋洙泗之門首崇四科顏閔之徒不稱閔閔士人立身德
行爲本宋之楊希仲幽室弗欺因魁多士明之田貴操行不苟
默佑後人記在彙編可爲矜式開

國之初青海一役洪文襄岳威信幕府招賢量材選用王鼎新
以勝國明經實司書記葛守敬以兵家韜畧久贊機宜咸却官
榮退休林薄雅志高尙較然彰明繼之者如王源之隱居講學
學使過境詢其起居童煒之總理修城制府阿公誅其行詣蓋

嘉道之際

國初太平之澤久民物康阜百姓安樂壽考其君子惇行上禮
毫期稱道苟賤嗜利者不齒於里黨以故鉅人碩德不絕於世
若楊廣生之遠紹關西李銳之恪遵朱學覃德新吳耀南之德
性堅定張極星夏應鼎之器識宏通程宗淳童宗沛之操行廉
介前修邑志高錫璽孫廷槐之道德純懿雷澤芳楊論烜之氣
宇光明其次倪朝輔劉鈞陳上衡吳珏張希敬文行兼賅壇席
彌廣中興以後並皆聚徒講學雅歌洋洋生徒濟濟雖囿於帖
括亦抑盛事也抑有潔身清行有才無命而修其天爵義符仁
壽康強逢吉子孫襲其餘慶則沈漢章吳鼎元楊立均其人也

文學專科聖門綦重雅言垂教莫先於詩而西江詩派倡之者
本黃山谷繼之者惟陳后山言銓深遠賤注惟難天社任淵以
殫見洽聞爲引經據典二書具在四海刊行匪徒宋賢之功臣
當亦藝苑之鉅製元明兩代著作多遺乾嘉之世明經陳在朝
副榜岳調陽號稱博學絕少傳書鄧湘詩文并美古體更爲蒼
勁同時羽翼之者姜浩本之意致冲淡林椿年之風韻秀逸童
檢父子雅擅詞賦唐慶澤兄弟並負才名歷年既久遺稿遂湮
古今文人成者百一傳者千一固自有數存乎其間矣惟童竣祇
之蜀哲粹編周國霖之五韻徵文綜故實於巴梁考形聲於音
詁有裨經典無愧方聞乃童書未刻而漸致叢殘周書雖刻世

鮮知者周君雅材好博持身清苦甫登賢書遽捐館舍嗚呼怖
矣其以武科顯者武進士四人尹希成楊忠保官至遊擊武舉
四十二人武功最顯者武獄年以參將武國用之子年少驍雄
洞究兵略吳藩逆命蔡毓榮率師進討克復湘黔郡縣獄年皆
先登陷陣裹傷力戰直抵昆明世璠窮蹙卒夷大憝論功加都
督僉事旋以傷沒年甫二十一其妻劉亦以節孝見稱而獄年
之族孫魁英由武生入伍從征達州教匪擒獲王三槐冉天元
回疆不靖復建大功總兵涼漢賞賚周渥請告歸里猶食全俸
年八十六卒於家福壽兼賅遇爲難及厥後立功西域又有周
玉超姚獻廷牟春陽材武絕倫并保提鎮其以忠節死事者獻

賊僭號王源長以拔貢罵賊血濺白及其妻徐聞而自縊諸生
藍燦鄒奇勳並爲殉國燦之妻媳投水甚烈事具勝國殉節錄
並祠忠義乾隆初歲金川逆命王師進討副將張占魁守備倪
占熬都司田占魁并以材官鐵騎疊著戰功殺敵致果號稱國
士而先後平定回疆從征台灣張功尤偉童鈞少與楊忠武遇
春齊名鈞尤疏武從征甘肅西藏廓爾喀功勳甚著教匪之役
守禦太平通川恃以無恐擊賊遇伏力戰而死忠武位列通侯
而鈞竟身膏原野庸非命耶粵匪事起天下徵兵岑輝樓以一
馬兵慷慨應募遠赴桂林捐軀報國聞風爭奮蓋逆之逼叙郡
全蜀震驚官軍藉口持重吳宗漢以武舉宣力兵部方擢守備

自京歸里與從弟鍾琦從副將張萬祿擊賊慶戰半日請援不至竟與主將同死身首分裂共爲傷喟自餘從征捐生與滇逆壓境罵賊而死者蓋不可勝計光武稱爲士大夫郡洵不誣矣若夫孝友睦嫻任卹徵諸耆舊猶不乏人呂元音刲股療母精誠上感二親並登上壽元音亦白髮齊眉諸孫十四輩聲譽序而清揚蔚爲儒宗五世一堂代有名德與倪坤之祖時錦并稱義門雷登鳴以樂山諸生避吳逆之亂遷居縣境事嫂如母教姪如子與四子五分其業子姪同列庠門而其裔猶盛夏應奎家累萬金弱冠早成見其父積勞老瘁請任家督雅善計然之術而六親窮乏咸被賙恤仲弟應楠性復豪快兩應京兆累三

千餘金應奎悉爲代償義激季弟共爲推產楊論烜嘉樹弱冠而孤朔望必至父塋移榻侍母四十餘年歲饑賑米百石劉德澍之父尊廊由豫章入蜀居積致富去鄉五千餘里每歲必寄多金修理祠墓廣爲賙恤其妻衛亦樂勸舉善廣文承誥承謚之姑也其後歲貢鄭聯魁附貢岑輝山職員楊逢春唐善仁昆弟好善樂施均有其遺風而劉紹先之四世同居王新民之兩次割股并可風世長樂興義以是名鄉有自來矣南徼藏衛津爲首塗供億浩繁歲以千計凡有夫馬統名和抬往歸富戶直年多至破家官吏因緣不可究詰胡大化之孫明清與王國治文周尙諸人據情上訴官爲收支民累雖除而每年條糧猶派

至五六千緡不等丁文誠下車裁汰夫馬初無定則王權李三長張成義諸人慷慨控告孝廉周永通職員沈作元復力懇縣令楊公昌錦始定爲二千五百六十緡方其不避險艱官府窘辱親鄙懼其連引及事平之日共受其惠然後知凡民可與樂成難與圖始也通濟鉅堰衣食之原眉彭司工歲有浮派又以隣爲壑堤塌增高無所宣洩縣城往往被災劉崇寬爲請於邑侯翟公訟言院司申明舊制刻石江岸坊庸有祀附諸先嗇宜矣邑中巨富向推龍馬寺董氏而董仁遇以萬租之家好行其德公家有事罔不力爲里鄙僉被其澤年至期頤樹坊道左有萬石君家範牧馬山有尹源清者出繼其叔旣叔復舉二子源

清蒸蒸色養友愛篤至軍興出家財爲團練捍衛閭里其力爲多先是傍山而居有彭雍顯幼遭孤露稟其母氏羅之教捐金四百建體仁橋於黃泥渡歲饑出穀賑糶遇貧民一不取資終身行之不改又有胡大化起家勤儉歲施棺槨林世葱歲歉施粥歲寒施衣黃水河建長橋獨任中洞制府蔣公攸銛旌之以額楊廷選捐修試院事皆章章可紀若夫幽閒有蹤端搽有容鍾儀郝禮炳我管彤貞賢之婦節烈之女賸朱育之對埒其英多披江源之志遜斯奇逸舊志新編邑人張希敬有編修志稿甄採切至粲然炳列無俟贅舉詩曰雖無老成人尙有典型又曰維桑與梓必恭敬止生斯土者尙其念哉尙其念哉

人類

新邑自遭獻賊之難土著僅餘數姓然皆逃至外縣匿跡洪雅以洪雅閭境未罹鋒刃

國初始還舊籍其後插業之家多自洪雅詢其原籍概係湖廣麻城孝感鄉是以湖廣籍邑人幾十居八九乾隆中葉乃有外省閩粵福建湖南雲貴諸人經商來縣遂家於是其後有山陝江西數省人亦因經商留寓斯地究其種族均係漢人故新邑人類一門不列他種

戶口

自古論郡國盛衰者恒視戶口損益以爲課最故周官一書鄉士掌鄉數遂士掌遂數縣士掌縣數凡諸民數皆書於版司民掌登萬民之數三年大比獻民數於王如今之看版是也然自五代以還海內恒困丁身趙宋承之遂廢役法於是民之與官惟相接於銀米之間而閭閻興耗存亡之數遂非牧令所知歲終士計之冊戶曹吏以意爲增損具文而已所爲斤斤稽多寡謀生聚今昔殊制舊文徒襲久之莫考其本意矣新津輪廣不逮百里而在成屬最稱沃野流賊之亂靡有子遺千里天府曠無人煙順治初歲承兵荒之後募民墾闢招撫流移廣行安插

居民乃稍稍衆焉其來占藉者率皆隣省本地十不一二且皆漢戶并無旗丁康雍以降休養生息生齒益繁日益加多言中國人數者稱四萬萬有奇吾蜀尤有人滿之患方今泰西諸國競以殖民是務其所以經營侵軼者不遺餘力今各行省改設學堂農桑工藝逐加講求皆爲教養之計誠以物產有數生計愈艱而滋生既衆奢靡之習日開賢士大夫挽回風氣厭亂無形匪徒標新炫異誇張文飾遂爲經世之策在此也昔陸清獻以理學名臣以縣令起官而其叙靈壽縣志曰土瘠民貧居官者不可紛更聚斂土著者不可侈靡爭競論者歎爲仁人愷悌之言今自

國初以來重熙累盛近三百年成都一郡未罹兵荒亦無疾疫土食舊德農服先疇號稱庶富而舊志所載中興以前戶口之數實多於今今則較前漸減豈案牘多所缺遺四境未盡採報歟近歲雖有記錄而某鄉某甲亦未分析姑就可以考見者略著於篇雍正元年原載二千四百一十一戶除雙流歸併不計外編審人丁二千五百九十七丁口其後乾隆五十七年停編審之制謂其擾民於是一縣戶口罕能詳其實數矣
乾隆元年至六十年又自嘉慶元年至十六年增添共五萬零五百四十七戶男八萬九千六百五十七丁婦七萬六千零七十七口實載男婦十六萬五千七百三十四丁口

嘉慶十七年至二十年實載五萬七百七十七戶男九萬二千一百零二丁口

嘉慶二十一年至道光七年實載五萬一千三百四十四戶男九萬二千一百三十六丁婦七萬七千四百二十口共男婦十六萬九千五百五十六丁口

道光八年至十七年實載五萬一千七百二十四戶男九萬三千二百四十六丁婦七萬七千九百零九口共男婦十七萬一千一百五十五丁口

道光十八年至三十年五萬二千九百三十四戶男九萬三千

五百五十六丁婦七萬八千九百一十口共男婦十七萬二千四百六十六丁口

咸豐元年至十一年四萬七千六百二十二戶男九萬一千一百三十五丁婦七萬四千七百一十五口共男婦十六萬一千八百五十五丁口

同治元年至十三年四萬六千五百一十二戶男九萬一千一百二十五丁婦六萬四千五百一十四口共男婦十五萬五千六百三十九丁口

光緒元年至二十七年三萬零七百九十一戶男八萬四千三百一十六丁女六萬六千八十九口共男女一十五萬零四百

五十七丁口

二十八年三萬零八百零五戶男八萬四千三百九十一丁女六萬六千一百三十口共男女一十五萬零五百二十一口

二十九年共三萬零八百二十八戶男八萬四千四百八十六丁女六萬六千一百八十五口共男女一十五萬零六百七十一丁口

三十年共三萬零八百三十五戶男八萬四千五百四十七丁女六萬六千二百一十六口共男女一十五萬零七百六十三丁口

三十一年共三萬八百一十六戶男八萬四千五百八十五丁女六萬六千二百二十口共男女一十五萬零八百零五丁口

氏族

明季甲申之難獻忠入川居民無少長男女同罹鋒鏑新津離省較近故遇難最慘十餘萬家獲免者不過數姓然率多幼孩不識家乘何自加以獻賊托名開科取士招集青衿聚而盡殲故文獻無存數典忘祖者不可勝責然實迫於時會使然無足怪者查邑中戶口幾二十萬家其土著者不過五六家其有族譜可稽者不過二三家以後遷居邑中亦不過數家有譜可考茲特就各家譜系所載臚列於左以爲邑中族氏所在不區區以科名殷實計也

楊氏系出姬姓晉城東四十里有地名莛楊晉叔向封於楊子

孫因以楊為氏自明永樂進士楊希仲之先已居新津老大岩

即今老據楊氏譜載君山脚

國初以芳桂芳秀為楊氏始祖生於明末獻賊之難楊氏一門青衿之士二十八人同日遇害囑二公避難隣邑二公晝伏夜行得至嘉定其時嘉定知府周汝楨係新邑人留芳桂居署中受學三年後周公病故復逃至洪雅從學貢生羅姓家羅妻以女生二子大生廣生皆順治末年嗣回新邑於康熙初年又生二子新生挺生四子均入邑庠廣生新生貢成均為邑中山斗雍乾間科名之士半出門下芳秀初逃兄弟相失後歸新津生二子居興義鄉高家村二公子孫傳至今已十代約六百餘家

男女丁口二千餘人譜又載芳桂回籍痛祖宗世系無存嗣培修生父春先墓於墓中得舊譜自明希仲上溯至周世系不紊故楊氏族譜自

國初以前概從舊譜

胡氏系出虞氏陳胡公之後陳本近楚小國胡氏族實為正派據胡氏譜載一世祖胡受由湖廣麻城縣孝感鄉避元時兵難遷四川犍為郡六傳至子昭係洪武翰林官刑部侍郎遷居榮縣幼從學方孝孺故與孝孺同日殉難其後子孫讀書均不應明試非子昭嫡嗣仍應明試譜載甲申之難獻賊入川胡氏一族青衿之士四十八人同日受難其後有胡應由榮縣遷邛州

道林寺由邛州遷新津又一支胡大斌在舊譜十六傳至

國初攜子天錫由樂山遷新津長樂鄉楊柳河口蔣家廟側又一支二十一傳胡文魁遷居新津興義鄉新場自

國初至今胡氏相傳亦約十代統計戶口五百餘家男丁女口亦約二千餘人

岳氏系出四岳之後據岳氏譜載遷邑始祖係明誥授明遠將軍鳳鳴宋武忠王十八世孫明末由安徽合肥縣遷居來川居新津長樂鄉金華壩今通稱店至今傳世十二代戶口約八十餘家男丁女口約四百餘人

岑氏系出周文王異母弟耀子渠封于岑子孫因以爲氏周秦

無考以東漢征南大將軍舞陰壯侯岑彭爲始祖世居南陽至北宋贈大理評事世衡生三子長正淑次仲淑仲淑於宋仁宗時隨狄武襄征儂智高始遷粵西爲粵西始祖新津一支係唐詩人岑參生子佐佐之曾孫卓兒官四川南溪縣沒祀成都名宦祠遂家南溪龍騰山下其後子孫遞遷洪雅新津名山等縣均奉公爲始遷之祖今岑氏自

國初至今傳十一世戶口約九十餘家男丁女口約五百餘人覃氏系出周宣王時譚大夫之後與仲山甫同時輔政傳至隋因避煬帝之禍始改姓覃至明永樂覃三元以殿試深花唱名者呼覃三元成祖疑姓之誤復命加言旁爲譚自

國初遂有姓譚姓覃之別康熙末年瀘州拔貢覃文教始遷新津金華場傳至乾隆子孫蕃衍煙戶近百家至今傳十代戶口約百餘家男女丁口約八百餘人

曾氏系出周姬譜載一世祖爲周簡王時鄩國君之世子名巫知鄩將罹莠人之患乃離鄩居魯後仕魯去邑爲曾五傳至崇聖參又五十二傳至南宋時曾廣新由閩遷粵興甯縣龍溪洞又由粵傳十八世至曾體賓於乾隆初年始遷四川簡州巫梁壻其子朝佐始由簡州遷新津至今傳世七代戶口三十餘家男丁女口約百餘人

宗教

邑無宗教之名歷代相傳三教并稱三教者何曰儒釋道是也儒宗孔釋宗佛道宗老別有巫教亦托名於老而實非老究其指歸不過挾符咒之術以爲能驅神役鬼蠱惑鄉愚不在宗教之列儒以名教爲先無論讀書與否具有良知良能俱囿於名教罔敢踰越故邑中凡未入他教者概宗孔教原不係儒不儒之分是以宗教不入儒家別歸儒於實業一門釋氏一派邑中僅有受戒未受戒之分無紅教黃教之別受戒多識字能誦佛經爲鄉民作佛事以升天堂免地獄爲主義未受戒者多不識字雖名爲釋教實不知釋教皮毛特失業之民借地容身耳道

教雖同宗老氏而有行教不行教之分不行教者謂之靜居道士高髻寬衣如釋氏住廟宇無妻室兒女廟宇有恒產者以諷經課誦長齋爲修行或託名避穀終日不食謂之清齋希登仙籍無恒產者出外遊方謂之化緣行同乞丐狡者以燒丹書符騙人財貨行教者謂之火壇行教有室家兒女無事與居民衣服無差別有事道場始服道服凡祈晴禱雨供天設壇專以行教道士爲之民間超薦死者半從佛教半從道教俗習相傳男子死通用釋道兩教家若婦人修齋多遵釋教以釋氏門徒有能破地獄出母於難之說其釋道兩家均以天堂地獄愚人相沿既久甘受其愚而不覺統計新邑凡釋氏廟宇三十餘所間

有住持先佛後老先老後佛或廟宇頽廢昔有今無鄉人別招無業之民年力衰邁者爲居士主持香火兩教式微大不如前釋氏不過一百一十餘人老氏靜居不過二十一二人惟火壇行教尙有三百一十二家託名老氏巫教亦有二百一十三家國初至乾隆之末邑中無外教之名道光中葉始有天主教入邑中傳教咸同間邑人僅有數家奉教尙無教堂奉教者多以賣藥爲業光緒初年從教漸多增至七八十家十九年後因隣邑焚燒教堂新邑教士避居邛邑地境邑中無賴之民貪利入教士居所毀其門窗戶壁而擄其零星餘物其後教士索償賠三千餘金復讓官地一通與教室相連始改建教堂更覺崇麗

可觀由是邑人奉教日增月盛至今有三百九十餘家自光緒十九年後天主教盛行二十一年始有耶蘇教流傳新津至今尙未建立教堂初來卽租居民彭姓房爲教室倡教時即有七八十家今亦增至二百一十餘家丁未春初教士復於邑中長樂鄉花橋場內租民房別爲一堂傳教場中及附近場內居民入教者亦百有一十餘家兩教勢力相埒邑中宗教幾徒知有天主耶蘇不復知釋道兩家爲何教時會所趨漸成風氣門戶旣闢競爭日繁所願教與教及教外之民均執公理化偏私庶氓主奴之見而爭端由此息矣

實業

五洲之內以中國爲農國中國各省尤以川省農業甲於他省新邑地褊人繁煙戶稠密除城市居民外無一不以耕種爲業間以鄉場市鎮附近田產居民亦自耕種故無論有土爲工爲商凡非殷實富戶無不兼營農利始足謀生茲考究實業以專務爲要不以兼習并舉故仍劃然列士農工商於右以明四者各有區別

士業查新邑業士者千五百八十餘人自變法後凡官公私立高等初等小學堂統計城鄉內外共三十九所凡男學生九百一十八人女學生六十六人男女學生共九百八十四人舊學

在庠百九十六人前後高等師範十一人初等師範五十八人舊學訓蒙住鄉各私館約一百三十餘人共計新舊學千五百八十餘人查舊學盛行之時邑中私立大小學堂三四百所學生應試者千六七百人蒙學加倍新學興而讀書反少不加強迫教育之令將來操是業者恐日益少也

農業除城市居民外及老弱婦女皆業是業山地瘠苦貧家婦女亦習農業約計農家十萬以外不能確定人數多寡

商業新邑商業花紗爲多外販大商十家有奇本境分售三百有奇織布之家二千有奇銀號九家典商一家皆外省人錢店二十餘家鹽商一家本境分售小販百三十有奇酒戶二十五

家行銷分售二百七十家有奇木行四十餘家製棹几箱櫃及一切器具二百三十有餘家棺木之家五十有奇運油米者百七十有五家嘉陽七屬之民及山陝江西大商人數雖稍減行銷加倍販煙之家百有奇水菸葉菸倍之藥行二家鋪戶五十三家統計城市鄉場一切雜項凡坐鋪不過二千七百餘家肩挑背負小販農隙爲商農時爲農不能確定人數多寡總之新邑商業尙未發達最厚貲本不逮萬金最多人數不逮萬戶物產雖饒製造未精工業不能頗興何怪商業不能發達耶
工業新邑工業攻木之工爲最木工有二營室爲多造器半之營室之工千有奇兼造器者半之專門營室者半專門造器者

亦半之造器之工七百有奇製農器者居其大半改木之工六百有奇刻木之工四百有奇攻石之工九百有奇能刻字與人物山水者不過三十餘人攻金之工冶鐵爲最鑄農器者六百有奇能製軍器者不過十之一二製銅錫者不過百二十餘家製銀器者不過三十餘家坊者與木工營室相附而行七百有奇織布之工爲最二千有奇邑中之布暢銷外處男婦同業縫衣之工五百有奇顧繡之工僅數家不過三十餘人作俑器者不過十有七人製冥銀者不過二十有餘家製冥錢者尙有百八十餘家勞力苦工皆農家貧戶爲之不以數計總之邑中工業相沿相習無發明新奇之人巧者可稱專工拙者仍兼操農

業工業不發達何怪商業不暢行也近年新政日頒東遊之士楊君澤彰歸來家頗殷實自製織布機器仿照外洋將來逐漸推廣新邑之布素稱精良行銷外處由此必更加增工業日盛商業自無不發達之理

新津縣鄉土志卷一終

新津縣鄉土志卷二

地理

新津縣城在成都府省城南方離省城九十五里正東界抵仁壽華陽雙流東南與彭山連界正南連彭山及邛州界西南抵彭山邛州西北抵邛州大邑正北抵崇慶州東北抵崇慶州雙流正東界曰花園場正西界曰界牌正北界曰張家場亦曰袁菴子正南界曰雙河場亦曰柏木橋緣袁菴子柏木橋與二場相離僅二三里許不知界址多誤以兩場當之城外分爲三鄉曰長樂太平興義長樂鄉在縣治之東地面均在西河之外由省城出南門過雙流至新津渡口俱此鄉地面東南爲牧馬山

一帶太平鄉在縣治之西南由省城進三藏大道出縣城西門
交界牌均太平鄉地面正南一帶均天社諸山環繞不通大道
興義鄉在縣治之北出北門至張家場到袁巷子交崇慶州界
卽至崇慶州大道三鄉分爲十支十支又分爲五十二保每保
或三四五六甲不一每甲約十牌每牌約十家鄉有總保其下
爲支保又其下爲團保又其下甲長牌首仿古編連保甲之義
此卽縣治域內區畫所由分其城鄉內外古蹟祠廟坊表橋梁
市鎮學堂另列如左

古蹟祠廟

新邑遭獻賊之難城郭邱墟人民塗炭古蹟蕩然又獻無徵間

有父老流傳半由前明祠宇灰燼之餘掇拾一二故古蹟併記
於祠廟

經藏寺在城內西門係明時重建內有鐵龍神一尊高八尺明
萬歷三十六年鑄相傳由唐僧取經住此得名

國初書院在廟中後始另建今改警察寺內正殿左右有楠木
八株植自

國初大及十圍

韋馱堂在東門城內朽敗不堪因前殿改設小學堂始加培葺
相傳有碑記係建自明時獻賊焚燬康熙四十六年知縣王汝
驥重建

觀音寺山名九蓮山宋淳熙辛亥年創修明景泰間僧碧峯福賓與其徒圓澈圓綱重修成化時增修殿宇至十二重康熙五年知縣常九經重修明蜀王頒經一藏

修覺寺縣治對河山太平鄉地面建自唐時有杜子美前後遊山詩後山門修覺山三字係唐明皇幸蜀書

寶華寺與修覺寺相連山門外有紀勝亭碑刻蘇頲濱題詩明萬歷時建康熙三十四年重修

白觀音在寶華寺之下有東坡演墨池洞口有洞天春色四字相傳係東坡題

龍巖寺與修覺山相距僅里許懸巖刻有隸書舊志相傳漢時

石刻

金水寺在太平鄉出西門離城十五里明萬歷時建乾隆初年培修今立小學堂一所

方井寺在太平鄉出西門約二十里有古磬鐵爐鑄自淳化年白衣菴在長樂鄉出東門八里今名東嶽廟明萬歷三十年趙天祥建

以上諸廟均有古蹟可考外如太平鄉之普慧寺瑞林寺長樂鄉之奇峯寺寶峯寺雪峯寺空慧寺中興寺廣福寺興義鄉之大顯廟平岡志齊一寺不二寺梓潼宮石佛院先主寺正覺寺均係明時所建以香爐鐵磬俱鑄有明代年號故雖別無古蹟

新津縣志
可尋亦足徵爲前代舊物未忍聽其淹沒不彰也

坊表

木坊一建自

國初在東門外曰少保故里相傳張唐英裔英舊居其子孫至今無存

石坊二一翟公清官亭建自同治初年在東門外以公有河堤之功一孫公清官亭建自光緒初年亦在東門外以公有橋梁之功自餘磚坊三鄉均有不若二公歲月日久口碑不絕

百歲坊一在太平場口係董氏所立董氏五世同堂有田萬畝咸同間爲邑中首富

橋梁

邑中小橋梁三鄉均多不當孔道不足以登記載惟東門外西河爲東南通衢會金馬羊馬二水夏則合而爲一秋末冬春分而爲三行人艱於過渡相傳有走盡天下路難過新津渡之說孫公倡捐募民一月釀千金餘造木橋三所長約半里許九月開橋四月始拆每歲餘有修費議經首二至今以爲常來往甚便行旅德之

市鎮

邑中市鎮共十八所惟太平場戶口六百餘家貿易較盛其次花橋梓永興場張家場戶口不過三四百家其餘僅八九十家

三四十家耳

花橋場出東門十五里

關家林出東門二十里

串頭舖

花園場

出東門二十里兩場相隔里許花園場外小石橋卽交

雙流界

羅家場出東門二十里

黃泥渡出東門二十五里在牧馬山脚

晉興場出東門二十里在牧馬山交雙流地面

金華場出東門十二里與東太一地面相連近牧馬山不當

大

太平場出西門離城五里

增盛場出西門離城十五里

方興場出西門離城二十里

界牌出西門二十五里交邛州界

永興場出西門二十五里交邛州界

鄧公場出東門過南河卽是在太平鄉之東約五里

雙河場出東門三十里交彭山界

張家場出北門二十五里交崇慶州界

新場原名興義場出北門二十五里

萬和場出北門二十里
三合場出北門三十里

學堂

城內外高等小學堂二所初等七所共九所

長樂鄉初等小學堂共十五所

太平鄉初等小學堂共十所

興義鄉初等小學堂共五所

道路

正路分四門

東門正路出東門過西河大渡至花橋梓十五里由花橋梓至花園場十六里上場石橋交雙流界由花園場到黃水河九里由黃水河至雙流縣城十五里由雙流至簇橋二十里交華陽界由簇橋至成都省城二十里此爲到省正路支路出東門在大渡右小路分支至普興場二十里由普興場至華陽曾家店十五里出界又出東門過南河至鄧公場五里由鄧公場至雙河場十八里由雙河場至柏木橋三里交彭山界此卽走彭山眉州大道爲下南路又由鄧公場左過西南合河大江至岳店子八里由岳店子至葉店兒三里由葉店兒至蒙子店十五里

由蒙子店至新橋五里出新橋二里許交彭山仁壽縣界此走黃龍溪小道

南門正路出南門過南河河外皆蒲江西來諸山山嶺層疊並無通道達大市鎮

西門正路出西門至太平場五里由太平場至鐵溪橋十里由鐵溪橋至界牌十二里交邛州界由界牌至邛州城七十里此即走邛雅大道爲建南通西藏正路支路出西門由太平場左手過晏河至永興場二十五里交邛州彭山界又由太平場右手分支至增盛場十二里由增盛場至韓場十五里在場頭與大邑交界

北門正路出北門至吳店子十七里由吳店子至張場八里出張場口至袁菴子二里交崇慶州大邑縣界此卽走崇慶州大道又出北門走東關廟十里由東關廟右至雙合渡五里由雙合渡過河至萬和場五里由萬和場至何店子八里交崇慶州界此走三江口小道又由東關廟左分支過龍王渡河至新場十二里由新場至福田寺六里由福田寺至明月寺四里交崇慶州界爲走崇慶州小道

山

山川能說古列九能之一輿地之學中外並重新津疆域介健蜀二郡間左迤牧馬右環寶資南河中貫岷江諸水匯於通濟堰在成屬最爲腴壤牧馬山在縣隸長樂鄉本境所轄上接雙流下入彭山東與華陽仁壽交錯綿亘數十里發脈於雙流之青礪墩華陽之高山寺一帶而自雙華場起山下至彭山之江口而止長約一百里橫約三四十里林巒森秀與東山對峙左瀕府江右帶楊柳河自紅岩至江口南河循山而流舟楫往還百貨委輸皆以山爲前導山不高峻地連五邑而原田沃衍陂塘相望物產饒富居民極衆力田勤儉有古唐魏遺風舊志相

承咸云蜀王牧馬於此前蜀後蜀未審何人而王祥孟昶并崇
侈靡郊坰餉息冀求蕃衍事或然也自雙華場至王家場十里
左至鐔鑽窰十五里至普興場三十里十五里興隆寺入縣界
左至傅家壩二十五里東至古佛洞二十里又東至黃龍溪三
十里普興場至紅岩十二里地又新彭相錯山有甕牛象鼻極
樂雲峯奇峯紅岩諸名而天宮廟雷家坡高踞山脊迥出衆山
之表附郭山水俯列眉睫紅岩下臨大江最爲一邑佳勝岩產
石膏色紋緞駁大小洞穴以十數居民嘗攜鋤篝火刷石爲業
今則地利已竭半以白泥劓雜非復從前佳質矣山中田地各
半不通河流悉賴塘水灌溉間有導引溪澗蓄水爲堰者一遇

旱燥每多荒歉又春之際以紅苕當米焉然亦不數數水利所
在華陽有藍家溝雙流有林家溝在本境者爲龍溪河水出象
鼻山經金家壩至迴龍菴入彭山界又八里入江流三十餘里
水泉潛浸著藻交縈瀕河彌望平皋豐沃忘其爲山也地丁外
津貼捐輸減半以故境土雖瘠而民不病俗多儉樸草舍土壁
取蔽風雨亦有瓦屋富家十不三四而名列膠庠者相繼弗絕
其登賢書者華陽有王一貞本邑則克讓與胡鴻熙彭山則劉
鉞拔貢雙流有古澗爲劉沅師彭山有毛鳳洲而邑之筮回竄
舉孝廉方正尹氏一門武科尤顯其植物松與青岡最盛竹柏
雖不茂而質特堅勁其他桃杏梨橘果木諸樹隨在而有土產

則五穀之外半宜小春近則多種粟而紅苕白苕生薑花椒
甘蔗地瓜芋子最稱饒衍每霜降前後落實取材運往縣城填
溢衢巷隣境商販恆來取售蓋亦益部之奧區也

縣治大江之南有山焉城陀起伏由蒲江諸山自永興場折而
迤南爲九蓮山麓循江而下形如玦環蜿蜿蜒蜒至彭眉之境
統名之曰寶資山有云山接蔡蒙傳聞之誤按蔡蒙之山由五
絲山分支一支自大邑縣來者爲斜江河界斷一支自邛州來
者爲蒲江河界斷形勢若接實不相連永興場之北爲邛州彭
山分界南爲新津轄境西南三十里伏虎山二十五里九蓮山
古名巖灘觀亦名平蓋山今名觀音寺松篁晻靄爲邑叢林相

傳崔孝通得道於此五代杜光庭有訪孝通不遇詩十五里十
合門自油石坡下至九蓮山山溪之水凡十溝皆匯於此又十
五里烏尤山山有林壑之勝與漢嘉同名十二里獅子山兩山
相峙互爲起伏俗謂之雙獅撲飛蛾又前曰鐵旗山其發脈自
稠稷天社兩山橫結迴抱斜展爲旗十里陡溜山磴道盤空高
出衆山之表往有紅豆一株蔭可數畝殆數百年物今無存矣
又東南十里橫山于自大雲山而下堰水隨流諸山皆縱此山
獨橫又南八里朱家山發脈亦自稠稷紫峯環抱兩澗交流堪
輿家以爲形勝第一崇慶州進士朱懋炳之父葬此因名又南
六里曰龍巖山谿澗掀舞山形如龍巖下往有佛像千百雕鐫

極工歷年久遠并皆剝蝕又有石鑼石鼓排立巖巔義取象形徒具近似其頂亦名聖燈又在上曰稠稷山今名老君山孤峯秀出古柏森列琳宮瑰璨香火極盛山有石洞幽邃涼敞傳爲道家服食之所方輿覽勝山有仙草名稠稷服之可以長生未審何狀咸謂洞出煙雲必降甘澍縣志以爲八景之一又南四里插旗山山巔一墩巋然突起圓正如削傳爲獻賊立營處又南四里許大雲山又名瑞麟山峭壁巉峴佛像嵌壁巖泉滴玉味尤清冽壁間題名多就剝落往有紹興年字雖經僧智修鑿近復殘缺光緒初歲山穴崩裂中多古錢古碗鄉人取歸不知寶貴也又南里許筆架山三峯兀立對峙學宮近則山民刷石

競稱石厰雲根剝斷無復形勝矣又南曰天社山山在南岸北枕大江南接連嶺元和郡縣志稱爲益土有難人多依焉華陽國志則以爲李冰所鑿文井之水至此入江其上有寶華寺寺枕山麓江城入畫門外有紀勝亭爲蘇文定轍題詩處圯後重建又南曰修覺山一云主簿山杜工部陸放翁并嘗遊此詩碑猶存迤左巖下有泉滂出石凹承溜歲久成池旱歲不竭能愈瘡瘡巖間有洞天春色擘窠四字其麓有石穹窿呀口蹲地俗呼爲蝦蟆石再上爲雪峯山雪峯觀俗名玉皇觀自江頭望之青翠照水浮圖蘭若迥出於杳靄雲烟之外觀不知始於何時殿壁皆壘石而成雖鮮壯麗之觀而遠山近水豁人心目是爲

新津縣志卷之二
邑之名勝其他掛榜臥魁官倉觀斗玉屏葫蘆帽盒平岡諸山厥名不一皆傍南岸上下再下十五里爲文峯山入彭山境矣是山凸凹相望居民甚寡多樹少田縣中薪木恆賴取給而獅子山一帶佳城鬱鬱墳塋極衆占風水者以爲攬江山之勝而不知運會無常陵谷有時而變也

水

東華錄云江水自黃勝關流自灌縣分數十支復合爲一華陽國志大江自湔堰下至犍爲有五津始曰白華津二曰五里津三曰江首津四曰涉頭津五曰江南津其名迥與今異而縣在漢晉之世犍爲郡管建於此其在境內無疑王子安送任少府之蜀州詩所謂城闕輔三秦風煙望五津是也今之諸水皆會於溫濟堰堰橫五里衆流奔赴泓涵演迤眉彭兩境賴其溉潤厥利殆溥然就縣治觀之南河爲正流而以江源論之岷江乃爲正流水經江水又東南過犍爲武陽縣青衣水沫水從西南來合而注之關道元注云縣故大夜郎國漢武帝建元六年開

置郡縣有鄱江入焉出江原縣首受大江東南流至武陽縣注於江縣下江上舊有大橋廣一里半謂之安漢橋水盛歲壞民苦治功後太守李巖鑿天社山尋江通道此橋遂廢縣有赤水下注江此縣藉江爲大堰開六水門用灌郡下江水又與文井江會李冰之所導也案青衣水沫水爲江之下流赤水卽南河也除楊柳河外皆會於堰左昔之五津今分三渡金馬河由溫江雙流至三合場入新津縣界又至焦巖寺下之馬家渡復與石魚河合石魚與金馬相隔不五里經溫江縣西江原廢縣東至福田寺入新津界又十五里至馬家渡合金馬河此由省至新津之第一渡也第二渡則羊馬黑石第三渡則文井江此三

渡之分合源流也自餘諸水條繫如左

大江自灌縣城西寶瓶口東流者謂之內江自人字堰南謂之外江卽岷江正流今之金馬河也古名鄱江一名皂里水鄱一作鄆水出灌縣青城故縣南流至溫江入猪母水繞長灘經雙流擦耳巖至三合場入新津境分支支流經羅家場至田渡口合流又分二支至廣灘并合逕天社山下與邛水合其源自都江堰南流而下至灌縣之玉堂場先分一支爲沙溝河再分一支爲白江河皆至崇慶州元通場入文井江至中興場又分一支爲黑石河復分一支爲羊馬河而至溫江之長灘又右分一支爲石魚河左分一支爲楊柳河金馬則正流也水性湍急沿

江田廬常被漂沒沿河有永濟石馬大郎諸堰灌長樂鄉田石魚河岷江之支流也河面不寬不通舟楫岷江正河流至溫江之長灘擘然中分東爲金馬西爲石魚相去不過四里許今之水道則在羊馬河老君渡起水經張家橋廻龍寺雷家渡廣兒灘至新津之田渡口合金馬河在崇新之境有黃荆堰引河水灌田二千餘畝

羊馬河在縣東北岷江之第三支流也由灌縣中興場分一支爲青羊河羊馬河南流至清涼寺入崇慶州界經晏家渡鄢家灘老君渡羊馬渡而下過江原廢縣迤三江口合青羊黑石二水至縣之新開堰上游復分一支至新興場合流又分一支至

龍王渡合西河匯流入江沿河有紅花堰新開堰永通堰七星諸堰

沙溝河岷江之第一支也河由灌縣玉堂場右分支下至石牛堰又分爲白江河一稱左江河俱經崇慶州元通場入文井江至州城北又分爲二西爲西河東爲白馬至西河壩入縣界仍合文井江統謂之西河至龍王渡與羊馬河合

西河卽文井江下流文井江至元通場經崇慶州西而南下入縣境張家場上與白馬河合其源有二東源出灌縣六頂山西源出大坪山小海子合於大偏巖下經崇慶州何家場受軌五里河又受味水再下又受白江河水沿江有小水十里羊頭石

頭鐵溪千功六堰此六大堰者皆引水於文井江江水清甘米味尤美其價常高南河米焉

南河在縣治之南一名赤水夏秋之交河多山水其色昏濁故受此名其實合邛蒲斜江鐵溪諸水也邛水出邛州正西山經高場何場州南之南河埤合西河至楊場合斜江河又至上蔡渡與蒲水合蒲水發源於名山縣之小海子經兩合水會丹稜羸子坡水至蒲江之雷河合百丈驛水臨溪河通謂之蒲水下經壽安鎮迴龍至永興場入縣境

鐵溪河官渠河均自崇慶州西右分文井江水同源異流經大邑縣至縣雙虹橋合禮木河又至鐵溪橋合鐵溪河統名雁河

禮木河亦文井分流上爲朱崇堰下爲禮木河經大邑縣入斜江至界牌入縣境有草木堰甄堰

石頭河其分派自崇慶州文井江南之右羊頭堰至縣之太平橋合雁河至麻柳灣與南河合

斜江河源出大邑鶴鳴山委曲斜流故有湯家堰水分三泮灌田萬餘畝

耨水亦在縣西發源於大邑鳳皇山之虎擘泉經耨壩場受大飛水小飛水西折合於邛水

楊柳河金馬河之分流也逕溫江縣入豬母水繞彭場又經雙流縣黃水河至縣白雲渡經黃泥渡至河口入大江河面不寬

而終年不竭油蔴菜菸舟楫往來相望沿河有五所黃泥復興
新堰諸堰灌牧馬山下田在雙流境者有白頭堰白玉和場引
水

物產

新邑農國也居民多以耕種爲業堰田上上可收兩季上季宜
禾下季宜麥其次爲冬水田僅收一季河壩多種芋麥大小麥
葉菸甘蔗菜子花生西瓜二十年前多種花生每畝可收二石
餘斗製爲油倍於菜子其後減收每畝至一二斗之少遂別種
甘蔗創立糖房熬糖山田與冬水同惟地與河壩種植稍異山
地多植紅白苕及地梨鴉片木多樅樹果品無桑柘桑柘惟河
壩多沿河俱檉木楊柳田野亦多檉木林園多種竹與楠柏木
取青蔥之象以壯觀瞻昧宅下樹桑可以衣帛之義凡此植物
之類川省各州縣從同別無特產動物亦無特產農家必飼豬

牛以豕能糞田牛能力耕居民多食豬肉無屠牛家礦物惟牧馬山出石膏別無特產故不復贅述

商務

邑地雖狹河山交錯水陸互通富商大賈在所必爭本地居民既無厚貲復憚遠行祇分餘利統計中外五洲之大以外洋爲行國中國爲居國中國商業不如外洋合中國計之川省山川險峻居民憚於越外川省商業又不如外省合川省計之新邑離省較近土田較美百畝之家足以自給更無遠志商業又不如外縣何以徵之新邑商務花紗爲最然皆湖北江西兩省人握其利當商銀號亦握厚利然皆秦人爲之鹽爲必需之物亦印人專利惟油米與嘉陽七屬之民相較邑人約得三分之一其餘日用尋常諸物自本境出卽銷行本境無大利益不足以

言商務自無外界相爭概從闕如茲特標其重大者如左

棉花向由湖北運來行銷邛蒲大邑州縣上年暢銷約計兩萬餘包每包約計常價四十兩每年約計百萬餘兩近年因詳紗抵塞止銷四千包

詳紗由上海湖北運來自光緒十八年起在本邑行銷邛蒲大邑諸州縣每年約二萬餘包每包四十餅一百六十斤約計常價五十兩每年亦百餘萬兩坐號均湖北江西人邑人業此均由兩省人分售

鹽改歸官運向由犍樂運來行銷本地每年百二十張引每張引五十包每包百六十斤餘引每年亦可銷五十張上年定價

每斤三十二文今官運定價增至七十二文商人邛州周姓布自本地貧民織造製成男女俱能爲之分條子白正兩宗條子大布長四丈台正小布止有三丈條布行銷崇甯溫江郫縣雙流省垣等處約十萬餘件每件輕重三十餘兩不等價銀或一兩九錢八錢亦不一台正行銷崇慶州邛州灌縣松茂爐城等處每年約二十餘萬件每件價銀值五六七錢不一商人多少負販無絕大貲本家

米自邛蒲大邑運來行銷嘉陽七屬及下河一帶常年約七八千石間有萬餘石本境所產亦可行銷五六千石常年每石五六兩不等荒年八九兩至十餘兩不一嘉陽人與本地人業此

油本地所出行銷嘉陽一帶每年約四五千缸每缸一百六十斤價銀十兩外

葉菸本地所出行銷雙流雅州嘉陽一帶每年約二千餘石每石八十斤常年價六兩或七八九十兩一石不等

花生本地所出行銷彭山眉州上年約二千餘石近年減至五六百石每石價銀六兩零居民因地土性質忽易不宜花生乃購簡州熬糖甘蔗種遍種河壩兼有保護泥沙之功

糖自光緒初年始由岳姓家女適簡州某姓歸甯新邑始在岳家店建築房舍雇簡州人創辦今已添至十餘所自十月起盛糖至冬臘月止每糖房出五六萬斤七八萬斤不等每斤價二

十餘文行銷本地間及連界州縣邑中創辦之物僅此糖泡子可釀酒釀法與燒酒同味亦同新酒味不甚佳越歲餘甚美兼有瀉上焦功用但所釀無多糖房主人僅足自用間或餽親友無出售者故不列商品

酒縣城內外凡烤燒酒之家二十五戶黃酒一戶燒酒每日出酒三千斤每月共出酒七萬五千斤行銷眉州張家坎每月一萬餘斤行銷簡州東山一帶每月四萬餘斤行銷本境二萬餘斤黃酒每月出酒一千斤僅足供境內之用無外販來售

新津縣鄉土志卷二終